

Dewan niaga Cina gandakan biasiswa kepada Mendaki

DEWAN Perniagaan dan Perusahaan Cina Singapura (SCCCI) telah menggandakan jumlah biasiswa yang diberikan kepada Yayasan Mendaki mulai tahun ini.

SCCCI, subsidiari Yayasan Dewan Perniagaan Cina Singapura (SCCCF), akan memberikan \$20,000 kepada badan bantu diri itu setiap tahun sehingga 2015.

Jumlah itu dua kali lebih banyak berbanding jumlah yang diberikan kepada Yayasan Mendaki sebelum ini.

Itulah antara perubahan yang dibuat SCCCI dalam semakan terakhirnya bagi tahun 2013-2015 yang dilakukan baru-baru ini.

SCCCI bermula dengan menganugerahkan biasiswa kepada mahasiswa tempatan yang cemerlang dari Universiti Nasional Singapura (NUS) dan Universiti Teknologi Nanyang (NTU) sejak 1997.

Biasiswa itu turut diberikan kepada Universiti Pengurusan Singapura (SMU) mulai 2002.

SCCCI kemudian menawarkan biasiswa kepada mahasiswa Melayu/Islam di universiti-universiti tempatan menerusi Yayasan Mendaki sejak 2004.

Tahun ini, SCCCI akan turut memberikan biasiswa kepada Universiti Teknologi dan Reka Bentuk Singapura (SUTD).

SUTD bakal menerima biasiswa \$20,000 setiap tahun daripada SCCCI.

NUS, NTU dan SMU pula masing-masing akan diberikan \$40,000 setiap tahun – lebih seganda berbanding sebelum ini.

Secara keseluruhan, SCCCI telah berikrar akan memberikan sejumlah \$480,000 bagi empat universiti dan Yayasan Mendaki selama tiga tahun dari 2013 ke 2015.

Jumlah ini lebih seganda jumlah sebelumnya sebanyak \$210,000.

Seperti tahun-tahun sudah, setiap biasiswa ditawarkan tanpa bon.

Namun, berbeza daripada tahun-tahun lalu, kali ini universiti-universiti diberikan kebebasan menggunakan jumlah yang diberikan untuk memenuhi keperluan masing-masing.

Satu majlis menandatangani perjanjian bagi biasiswa-biasiswa itu telah diadakan bersama wakil-wakil daripada lima penerima tersebut termasuk Ketua Pegawai Eksekutif Yayasan Mendaki, Cik Moliyah Hashim, di Sun Yat Sen Nanyang Memorial Hall, semalam.

Dalam ucapannya, Presiden SCCCI, Encik Thomas Chua, berkata SCCCI adalah pertubuhan perniagaan yang telah mengikrarkan sokongan teguh kepada pendidikan sejak tahun-tahun awal penubuhannya.

“Dalam memperbaharui biasiswa-biasiswa bagi tempoh tiga tahun baru ini, kami memutuskan untuk membuat beberapa perubahan lanjut dari segi skop dan kuantum.

“Kami melihatnya sebagai satu langkah yang bermakna sebagai sebahagian daripada misi kami untuk menyokong pendidikan dan mencungkil bakat-bakat muda untuk masa depan masyarakat,” katanya.